


*Promé*  
*Pasonan*



**Buki 2**

# NO MI BOLUNTAT...

## Lès 1

Tur hende tin ku siña obedesé. Muchanan mester siña obedesé nan mayornan i dosentenan na skol. Adul-tonan tin ku obedesé bòrchinan di tráfiko, leinan di nan pais, i doño di trabou. E kristian tambe tin ku siña e lès aki.

Dia ku bo a pidi Hesu-Kristo pa salvábo di bo pikánan, un kambio di gobièrnu a tuma lugá den bo bida. Promé, abo tabata sinta riba e trono di bo bida. Ma awor, Kristo ke ta Rei di bo bida. Bo tin ku someté n'E. Awor bo ta biba pa hasi Su boluntat. Bo por haña sa kiko Dios ke pa bo hasi dor di loke E ta bisa den Su Palabra: e mandamentunan, spièrtamentunan, i ehèmpelnan den Beibel.

### FORMANAN DI PIKA

Tin bes nos no ta para ketu i pensa kon nos por desobedesé Dios. Bo por hasi piká diferente manera. Mateo 15:19 ta mensioná tres klase di piká. Hala un liña for di e palabranan di Mateo 15:19 pa e forma di piká:

- |   |                       |
|---|-----------------------|
| a. “ <i>pensamentu malu</i> ”                               | 1. Piká di palabra    |
| b. “ <i>matamentu, adulterio, fornikashon, ladronisia</i> ” | 2. Piká di pensamentu |
| c. “ <i>testimonio falsu, kalumnia</i> ”                    | 3. Piká di echu       |

Bo tambe por hasi piká ku un aktitut vengativo, yalusí, nenga pordoná, envidia, amargura, èts. Den kasonan asina, kisas loke bo ta bisa i hasi ta bon, ma e **motibu** ku bo ta bisa i hasié ta piká!

### MOTIBUNAN PA OBEDESE

Kiko bo por saka afó ta motibunanan pa obedesé Dios segun e siguiente tekstonan?

1. Juan 14:15,21,24 \_\_\_\_\_

2. Eklestastes 12:13-14 \_\_\_\_\_

3. 1 Korintionan 10:31 \_\_\_\_\_

Mateo 7:24-27 ta deskribí dos hènber: un hòmbber sabí i un hòmbber bobo. Lesa e teksto anto kontestá e siguiente preguntanan.

	<b>E Hòmber Sabí</b>	<b>E Hòmber Bobo</b>
Riba kua fundeshi su kas tabata trahá?		
Kiko a sosodé ku e kas?		
El a tende Palabra di Dios?		

Kiko tabata e diferencia entre e dos hòmbbernan? \_\_\_\_\_

## **SIÑANDO PA OBEDESE**

Ningun mucha ta siña obedesé den un ratu di ora. Ta méskos pa esun ku aseptá Kristo. E siguiente ta algun yudansa pa siña obedesé Dios:

1. Bo mester sa kiko Dios Su mandamentunan ta. Bo no por obedesé algu ku bo no sa. P'esei ta imporante pa lesa, studia, memorisá, i meditá den Palabra di Dios tur dia pa komprendé loke E ke pa bo hasi.
2. Bo mester apliká (hasi) loke bo sa. Talbes tin hopi kos ku bo no sa di Beibel. No preokupá tokante esei: bo lo bin konosé Beibel mihó. Loke ta imporante ta pa hasi loke bo **sa** Beibel ta bisa. Kiko Santiago 4:17 ta bisa ta piká?

---

Ki benefisio di obediensia Juan 8:31-32 ta menshoná?

---

3. Pidi Dios pa poder pa obedesé. Algun mandamentu di Dios ta fásil pa obedesé. Otronan lo ta impusíbel pa bo obedesé sin Dios Su poder.

Beibel ta Palabra di Dios. P'esei, ora bo ta obedesé Beibel, bo ta obedesé Dios mes. Segun 2 Timoteo 3:16, Palabra di Dios ta útil pa siertu kos. Kiko e kosnan ei ta?

<b>2 Timoteo 3:16</b>	<b>Deskripshon</b>
	Ta laga sa loke bo mester kere i hasi.
	Ta laga sa unda bo a hasi piká.
	Ta laga sa kon pa kambia.
	Ta laga sa kon pa biba.

### **KUA KULTURA?**

Tin kos den kada kultura ku ta bon. Ma tambe tin kos den kada kultura ku ta malu. Ora bo ta rekonosé Kristo komo Rei di bo bida, bo ta skohe pa sigui un kultura nobo...e kultura ku Dios a preskribí. Filipensenan 3:20 ta bisa ku e kristian ta suidadano di

\_\_\_\_\_ . Kiko 1 Pedro 2:11 ta yama e kristian?

---

E persona ku a aseptá Kristo ta manera un turista. E turista tin un kultura distinto for di esun di e pais ku e ta bishitá, pasobra e no ta suidadano. Ta méskos ku e kristian. E ta komport'é segun normanan i reglanan di Dios. Si tin kos den bo kultura ku ta kontradisí Palabra di Dios, bo ta pone esei un banda.

## MANDAMENTUNAN KU BO NO TA GUSTA

Tempu ku bo tabata mucha, bo mayornan a bisábo pa hasi siertu kos ku bo no a gusta hasi, p.e. laba tayó, bari kas, chapi kurá, èts. Ma e echu ku bo no a gusta hasié no a skapábo di obedesé. Maske bo no a gusta, tòg bo mester a hasié.

Adultonan tambe mester obedesé siertu lei ku talbes nan no ta gusta. Ningun hende ta gusta paga belasting, pero tòg nos tin ku obedesé gobièrnu.

Den bida kristian tambe por tin instrukshon den Palabra di Dios ku bo no ta gusta, no ta di akuerdo kun'è, òf no ta kumbiníbo. Pero esei no ta dunábo derechu pa keda sin hasi loke Dios ta bisa. El a kreábo, ta stimábo, i sa kiko ta mihó pa bo. Filipensenan 2:13 ta bisa ku Dios ta hasi dos kos den bo bida. Kiko nan ta?

*“..Dios ta Esun ku ta obra den boso, tantu pa \_\_\_\_\_  
komo pa \_\_\_\_\_ segun Su bon boluntat.”*

Kiko 1 Juan 5:3 ta bisa di Dios Su mandamentunan? \_\_\_\_\_

\_\_\_\_\_

### TAREA PA KAS

1. Evaluá onestamente bo obedensia. Tin área ku ta laga di deseá?
2. Siña Santiago 4:17 fo'i kabes.
3. Konta un persona ku bo a aseptá Kristo komo bo Salvador personal.
4. Sigui fiel ku bo tempu ku Dios—sikiera 15 minüt—tur dia.
5. Lesa e siguiente lès i yena e kontestanan.